



Sesida dals

20 d'avust 2024

Communitgà ils

21 d'avust 2024

Protocol nr.

662/2024

Incumbensa Rüegg

concernent l'examinaziun da las contribuziuns da scolaziun en vista a la mancanza da forzas da lavur

Resposta da la Regenza

La revisiun totala da la Lescha davart las contribuziuns da scolaziun (Lescha da stipendis, LStip; DG 450.200) ch'è vegnida messa en vigur l'onn 2007, è sa cumprovada. Las sulettas midadas dapi quella giada èn stadas adattaziuns redacziunalas resp. terminologicas pervia da la refurma dal territori sco er da la Lescha davart l'organisaziun giudiziala. Las prescripziuns dal Concordat da stipendis da la CDEP (DG 450.110) ch'è entrà en vigur il 1. da mars 2013 (participaziun dal chantun Grischun sin basa dal conclus dal Cussegl grond dals 20 d'avrigl 2010, DG 450.100) pon vegnir ademplitas cun la Lescha da stipendis resp. n'han betg pretendì adattaziuns. La premissa per conceder contribuziuns federalas è d'ademplir las disposiziuns d'armonisaziun dal Concordat, ch'èn relevantas per il stgalim terziar. L'onn 2023 ha il chantun Grischun survegnì contribuziuns da var 564 000 francs da la Confederaziun per finanziar las expensas tenor la Lescha da stipendis.

L'intent da las contribuziuns da scolaziun è quel da promover l'egualitad da las schanzas per absolver ina scolaziun. Quai vul dir ch'il chantun paga stipendis ed emprests a persunas, da las qualas l'atgna capacitad finanziala sco er tala dals geniturs na bastan betg per cuvrir ils custs da scolaziun e da viver. Il dretg da survegnir contribuziuns vala per scolaziuns sin il stgalim secundar II e sin ils stgalims successivs. Er sto la scolaziun terminar cun in diplom che vegn renconuschì da la Confederaziun u d'in chantun. Ch'il chantun reguleschia las scolaziuns, n'è betg l'incumbensa da la legislaziun da stipendis. Quai vul dir che l'import dals stipendis na sa differenziescha betg tenor la scolaziun per stgalim.

Las persunas che han il dretg da survegnir contribuziuns figureschan en l'art. 4 LStip. Per cumplettar l'art. 4 al. 1 LStip èsi er pussaivel – tenor l'art. 4 al. 2 LStip – da conceder en cas excepziunals contribuziuns da scolaziun ad ulteriuras persunas. Questa regulaziun excepziunala permetta a la Regenza d'adattar l'Ordinaziun tar la

Lescha davart las contribuziuns da scolaziun (Ordinaziun da stipendis, OStip; DG 450.250) e d'uschia integrar svilups sco er da conceder stipendis ordaifer il circol da retschaviders che vegn menziunà en l'art. 4 al. 1 LStip. Quai per exempel a persunas sur 40 onns senza in diplom da la furmaziun professiunala da basa.

Il post chantunal da stipendis exequescha la legislaziun chantunala da stipendis cun in pensum total da 260 pertschients da plazzas. Dal mument che la dumonda cumpletta vegn inoltrada fin ch'il stipendi vegn disponì e pajà or, duri en media 20 dis.

Sch'ins resguarda l'entira Svizra, dura quai en media 38 dis (stadi: 07-2023). Tant la dotaziun da plazzas sco er la durada da la procedura è sin in nivel fitg bass.

Entaifer 17 onns è vegnidas inoltradas var 41 000 dumondas da stipendis. Dapi che la Lescha da stipendis è en vigur, n'hai dà nagins recurs ch'ins avess stuì tractar en ina procedura surordinada. Tut en tut è vegnids inoltrads circa 270 recurs; quai correspunda ad ina quota da 0,7 pertschient. La digitalisaziun resp. la transfurmaziun digitala è s'establida dapi ditg en il sector dals stipendis e vegn meglierada cuntinua-damain. La dumonda electronica da stipendis è in dals emprims projects en il rom da la realisaziun da l'administraziun electronica sin plaun chantunal.

Ord vista da la Regenza n'èsi betg l'incumbensa da la Lescha da stipendis da far ina politica economica u da favurisar singulas scolaziuns. Correspundentamain han ins er desistì d'integrar las contribuziuns da sustegn da l'Iniziativa da tgira en la Lescha da stipendis. En la legislaziun da stipendis na duain betg vegnir integrads elements da l'economia dirigistica u favurisadas scolaziuns da singulas branschas. Er na fissi betg cunvegnent, da regular las scolaziuns sur differents imports da stipendis (furmaziun professiunala vs. scolaziun da furmaziun generala) resp. d'opponer las differentas scolaziuns ina a l'autra.

La pretensiun da las sutsegnadras e dals sutsegnaders d'analisar ils effects da la Lescha da stipendis e l'incumbensa da suttametter al Cussegl grond propostas da midadas che pretendan ina revisiun da la lescha, pon vegnir acceptadas.

Sa basond sin questas explicaziuns propona la Regenza al Cussegl grond d'acceptar l'incumbensa qua avant maun.



En num da la Regenza
Il president:

Dr. Jon Domenic Parolini

Il chancelier:

Daniel Spadin